



DEO OPTIMO MAX.

UNI ET TRINO,

VIRGINI DEI-PARÆ, ET S. LUCÆ  
Orthodoxorum Medicorum Patrono.

QUÆSTIO MEDICA,

QUODLIBETARIIS DISPUTATIONIBUS  
*manè discutienda in Scholis Medicorum, die Jovis nonâ mensis  
Decembris, Anno Domini M. DCC. LVI.*

M. CLERIADO VACHIER, Doctore  
Medico, Præside.

*An ad motum Sanguinis in minimis vasculis plus faciat attractio, quàm pulsus  
à tergo?*

I.



ACHINAM hydraulicam corpus humanum  
dicere haud dubitamus. Nullibi enim partium vel  
minima acicula adigi potest, absque humorum ef-  
fluvio. Sua illi sunt conceptacula, sui que ductus,  
Ad sunt insuper aspirantes, expirantesque anthlie,  
quarum arguit existentiam mercurii molecularum resorptio,

A



multusque sudor per cutis incernicula dimanans; quo usque procedat ductuum decrefcentium divisio, definire valet nemo. Ex diversa liquorum, quibus ferendis dicantur, specie, diversa nata est eorumdem nomenclatio. Sanguinei sanguinem, lympham lymphatici coercent, & per nervos ad partes irradiantur spiritus animales. Pro usu etiam, arteriarum & venarum appellationes sortiti sunt. Horum instrumentorum concursu absolvitur sanguinis circuitio, crassis obvoluta tenebris, usque dum tritam à celsalpino viam calcando, haud infelici exitu enucleavit percelebris Harveius. Hoc titulo insignitur actio, quâ sanguis à corde ad extrema corporis, arteriarum ope, delatus, venis receptus ad ipsum revehitur. Cor musculosæ compagis, medio in thorace inter pulmones transversim ferè situm, quatuor vasis majoribus suspensum, innixum diaphragmati, inclusum in pericardio, jugi tenuissimi roris stillicidio irrigatum, duas intus cavitates ejusdem fermè amplitudinis, septo medio distinctas habet, ventriculos dictas, anteriorem unum, posteriorem alterum. Horum ex parietibus internis nascuntur lacertuli, sanguini atterendo dicati, qui in principio & progressu carnei, in tendines desinunt, valvulas mutuo coalita efformantes. Cordis thalamis bini prostant appositi sacculi, inter se coherentes, auriculæ nuncupati. Motus duos cor exercet reciprocos, diastoles nempe & systoles. Diastoles tempore, dilatantur ventriculi, sanguinemque accipiunt. Systole dum viget, indurefcit cor, pallefcit, imminuitur, ad costas arietat, sanguinem acceptum emittit. In auriculas regressum molienti obstant valvulæ. Dilatantur & contrahuntur auriculæ simul ambæ perindè ac ventriculi, sic ut diastole illarum, horum systole perfectè respondeat. E cordis sinubus cruor emissus, per totum corporis habitum arteriis defertur; quæ quidem sunt canales cylindracei, textu cellulari strictius densato & compacto conflati, ac proindè summè elastici, intus læves, sine valvulis, alterno contractionis & dilatationis nisu salientes. Cordi inosculatæ, ad penitiores machinæ partes, iterata & gradaria ramorum divisione, protenduntur. In humorum massam, quæ irruens distendit, reagent, ulteriùs propellunt, verberant, comminuunt, motu mox leni, placidoque ad terminum ducunt. Ex arteriarum cavis, sive immediatè, sive mediante quodam pulposo parenchymate, (quod indigitare videtur analogia) sanguis permeat venas, arteriis molliores, minùs elasticas, crebris valvulis in reptatu instructas, nullo modo pulsantes. Exilissima, vel tenuissima venarum capillamenta coalescunt invi-

eē in ramos majores, majoresque, qui pluries repetita simili coitione, in truncos abeunt sanguinem à partibus redūcem auriculis affundentes. Hæcce liquoris vitalis itineratio factis superque probatur, vasorum concidentia vulneri arteriæ inflicto superveniente. Ad eundem scopum collimant vincula systematibus arterioso & venoso injecta. Si priori, vasa turgescunt supra vinculum, infra verò flaccescunt. Si posteriori, quid omnino contrarium se dat oculis lustrandum. Non eādem lege in truncis & capillaribus cietur motus sanguinis circulatorius. In his enim plus facit attractio, seu molecularum affinitas, quàm pulsus à tergo, si desideretur vis systaltica, elasticitas, densior firmiorque textus.

## I I.

**P**HYSIOLORUM nullus ferè extitit, qui à solo cordis & arteriarum pulsu liquorum circulationem in quolibet vasis deducendam esse non existimaverit. Quantum, heu! error. Huic sententiæ addictus nimis, convicii rationem obnixè efflagitas. Omnem obsequiosi discutiamus caliginem. Jam te premit maximus angustioris loci vasculorum numerus. (In uno pollicis cubici latere ductus sanguiferos 900 detexit percelebris Author) nec mirum. Centenis rivulorum miriadibus cor impertit motum quolibet ictu. Ad ultimos arteriarum fines antequam pertingat liquor excurrrens, in millenos obices impingit. Dantur densæ ramorum flexuræ, datur & parietum convergentia. Remoram infert sensim aucta ductuum capacitas, has juxta physicæ leges, fluidi ex angustiori in majus spatium incurrentis imminuitur velocitas. Lentescentem facit usque adeò provecta capillamentorum angustia, ut vix unam quodlibet moleculam comprehendere queat; exilissimos namque minùs expedite, quàm majores tubulos pervadit, haud secùs, ac nunquam non difficiliùs angustioris, quàm latioris anathlæ embolus movetur, ob repetitos scilicet ex multiplicata superficie oriundos affrictus. Effati hujusce ultimi veritas sat ex infra dicendis elucescit. Oleum supra laminam cupream effusum, citiùs undequaque dispergitur, lentiore viciniore metallo guttularum series decursu. Intra canales sanguis, observante Baglivio, segniùs in peripheriā provolvitur. Hinc ergò patescit levis & ferè nullus, si quis à pulsu, in minimis vasculis motus. Rationi mirè suffragatur rerum eventus. Ad sanguinem è lato vulnere profluentem si advertas animum, guttatim stillat, uno eodemque tenore plagæ labra lambit, nec impetu facto, ut è ramo cordi viciniore pertuso, saliens exit. Lympha tenuis, pura,

sinceraque ulcus ad cicatrificationem vergens irrorans, modo exsudat insensibili. Eidem causæ acceptum referre lymphæ progressum per sui juris vasa minùs consultum videtur. Ex cruore secretus lymphaticus humor, statim migrat ad ductus sanguiferis sexta parte ad majus minores. Truncus quinque guttulis sufficiens, mox ab initio laterales ramos dimittit, seipso minores minoresque. Illorum numerum in spatio pollicem cubicum æquante existimavit 9000000 suprà dictus Author. Calculo inito fidem conciliat humoris serosi supra rubram partem exsuperantia. In torta, complicata, convoluta, in gyros multiplices necessario disposita affricum adaugent. Quis etiamnum concipi queat, non penitus cessare per tot meandros ducti liquoris motum jam in ortu languescens? A cruore enim in capillaribus sanguiferis à tergo urgente vim suam mutuatur. Quid de cæteris, si his extant angustiora, vasculis disjudicandum? Considerationem vix meretur arteriarum coarctatio, tota in vim elasticam refundenda. Hanc majoribus truncis insidere, parvam autem, aut ferè nullam capillaribus inditam suadent textus tenerior & faciliior, quam patiuntur, disruptio. Eandem & in truncis, & in minimis vasculis inesse concedamus. Quid tum? ad elateris exercitium necessaria requiritur vis distendens. At suprà dicta consideranti, compertum est prorsus in vasculis desiderari. Sexcenties capillo tenuiora detexit oculus vitro armatus capillamenta sanguifera, nec ullum pulsus, nullam vim systolicam observavit peracuta oculorum acies, eodem auxilio instructa. Parum ergò ad lymphæ, aliorumque tenuiorum liquorum motionem facit pulsus, qui cum sit insufficiens, in aliam inquiramus causam.

## III.

**A** TTRACTIONIS, vel affinitatis nomine, vim intelligimus, quæ corpora duo inter se analoga, modò ad contactus, modò ad sui ipsorum maritationem citò rapiuntur, cæterorum verò consortium refugiant. In illius probamen sexcenta in promptu sunt exempla, & luculentiori passim oculis obversante res illustrari potest. Oleum & aqua simul conquassata ladescentem referunt humorem. In vase quieto mox dissita olei guttula, factâ aquearum dissociatione, ad se invicem approximantur, & pristina restituitur pelluciditati aqua. Alkalino liquori acidum quodvis si affundatur, motu effervescentiæ suborto, concrefcunt unâ, novum exurgit ens, salmedium nempe. Phœnomenon illud, Chemicis si fides, ex sola partium salia duo constituentium identitate reperendum est. Illorum namque discrepan-

5  
 tiam in paucam partem phlogisticam, alkalino sali inhærentem tantummodo refundunt, & ideo contendunt utrumque ex aqueis, terreisque partibus coalescere; unde sub affusione aqueæ aqueas, terreas terreæ attrahunt. Particulis sanguinis integran-  
 ribus hanc vim à natura fuisse inditam, quis inficias ibit? An ovum ovo similis, quàm lympa lymphæ? An magis dispar à sanguine sanguis, quàm oleum ab oleo? Discrepant ne magis binæ seri, quàm aquæ guttulæ? An non in totum inter se conveniunt spiritus animales? Exinde guttulam lymphæ aliam sibi congenerem attrahere posse extrâ dubium. Sanguinis ergò molecula ulteriùs progressa, proximè à tergo sequentem adducit, & sibi comitem in omni cursu adsciscit. Hinc pulsus vices supplentur, hinc promovetur humorum motus in vasculis minimis; at alia non levis occurrit difficultas. Quânam enim lege prima ducens agmen commilitonibus viam sternat, meritò ac jure quæritur. Vix natam evanescere concipit, quicumque in sese recogitat attractioni suppetias ferre suctionem. Hæc observanda, dum tenellus infans, ore nutricis mammæ admoto, linguæque ad palatum revolutâ, liquorem lacteum copiosius rivulantem in corporis nutrimentum sugit. Tunc temporis papillam inter & linguam reperitur vacuum, in quod irrumpit lac pressit aëris circumflui è galactophoris expressum. Mechanismo haud dissimili, ex imis terræ visceribus aqua, anthliarum beneficio, effertur in conceptacula altiùs extracta. Sic itaque lympa, sive tenuis alius liquor vasa sibi partita peragrat, nec ultima vacua comperit quin citiùs irruat. Hanc quidem exinanitionem adesse non sinit continua ubique, dum vitam degunt corpora, guttularum columna. Vacuum nihilominus possibile distat in vasculis aëris absentia, quam probat his superveniens collapsus, ubi primum vacuantur contenti humores. Quos autem in recessus sese proriperet, unde reversus denuò occuparet vix relicta vasorum cava. Aëri circumfluo quasi innatantem lympham cœptum iter conficere absonum foret, ac stultum pronuntiare; nos à vesana illâ opinione arcent experimenta benè multa, de aëris cum liquoribus mixtione tentata. Sanguis machinâ Boilianiæ suppositus multas post exantlationes contentum ægrè dimittit aërem.\* Nec totam seri superficiem cooperiunt bullæ omnes, quot quot sunt è carceribus suis extricata; ex quibus in ferosâ parte oppidò rarum, intricatissimum in globulosâ liquidò constat. Ali-  
 ter, si fas sit ita loqui, citò ebullirent uterque & in immensum spatium expanderentur.

\* Vid. tract.  
 Anatomic.  
 Physio. Heist.  
 edit. 2. in-8°. pag. 166.



**H**ISCE legibus esse obsequiosum sanguinem in lienis cellulas effusum verosimilius; molecula nempe venarum radiculis resorpta, parietibus viciniorē attrahit, & ipsa attracta ad venas portarum, auxiliante, fatemur, partium vicinarum pressione, defertur. Nec penis, cruore in corporibus cavernosis aggesto, semel erectus unquam flaccesceret, nisi promovenda circulationi symbolum conferrent attractio, simul & suctio. Cum etenim extra corporis cavum pendula sit, neque ullā circumscriptā parte musculari, sanguinis reditui nedum faveant partis ipsius positura, visque adjacentium compressiva, reluctatur imo perpendicularis ductus directio, & pondus circulantis vincendum; chylus ipse non alio modo venas lacteas ingreditur; nulla quippe in intestinis vis trusiva huc usque innotuit. Succus ergo ex alimentis expressus salivæ, liquori ex interna ventriculi superficie depluenti, excretis in duodenum bili & succo pancreatico mixtus, affinis factus fluido in chiliferis ductibus jam contento, (si quidem mox dicti humores, eos jugiter instant, perviosque servant) devolutus per fistulam intestinale, venarum bibularum osculis applicitus attrahitur. Totum modò aquā injectā distentum canis abdomen detumescit, & remeante venas bibulas liquore, inane reperitur; desumptum hinc argumentum haud levis quidem est, ad suctionem attractionemque probandas, momenti. Balneo immersi corporis diluuntur fluida, mollia magis, flaccidaque redduntur solida. Tot quandoque optimi effectus, absque suctione, non sperandi. Ex valvularum apparatu & ascensu liquorum, anthliarum munere defungi venas conjicere primum est. Frequentes sanguinem regressurum valvulæ sistunt, ac sustinent, adeunti perviæ. Tot, credimus, necessariae minimè forent, si venosus sanguis ab arterioso à tergo urgente, & musculis contractis motum suum dumtaxat haberet. Nonne continuâ cordis vibratione, irrequietâ vi arteriarum oscillatoria ad venas delatus, sufficiens repagulum sibi ipsi foret, necessariumque sustentaculum. Lentescit verò admodum in capillaribus, & vis à corde impressa ferè tota adimitur. Eandem ergo ac in capillaribus motus causam agnoscit sanguis in systemate venoso. Quantò potiori jure pronunciandum, si mediante pulposo quodam parenchymate, sanguinem ab arteriis acciperent venæ. A corde propellitur humorum massa, elanguescentem motum exsuscitat arteriarum oscillatio, ad primaque capillamenta trudit. Immo non penitus forsitan perit in vasculis minimis motus à corde impressus; ast minor quàm qui tot illorum ambages superare queat. Partes suas agere musculorum contractilitatem non diffitemur. Membri plurimum

exerciti robur & crassities probant, confirmat & sanguis è vena secta, musculis digitorum contractis, celerius effluens. Verùm non continuus musculorum motus, in somno ac quiete feriat; flaccidæ torpent omnes ferè corporis partes,

## V.

**J**A M complures in nos insurgunt adversarii, nosque telis confodere tentant, quorum aciem retundere juvat. Prima hæc nobis occurrit refellenda objectio, quâ nostrum sistema infirmare gaudent, rapidiorem scilicet sanguinis motum sæpè sæpius oriundum juxta nos explicari posse negant. Speciosa quidem hæc, at strenui non deponimus arma, utque inconcussa maneat sententia nostra, pauca hìc subjungemus. Ecquis nescit, si naves ascenderit, aliaque adiverit loca, ubi repositæ sunt anthliæ, pro frequentiore, vel rariore emboli tractu, citius, vel lentius exhauriri aquam & majorem, vel minorem in situlas liquoris cujuscumque effundi quantitatem. Cordis thalami situlas, embolum valvulæ referunt! Nonne constat, hæc prout frequentius, dato tempore, pulsantur, majorem affundi cordis sinubus sanguinis copiam, & celeriori cursu intra venas ascendere cruorem? Ex supra dictis molecula sanguinis prior elata, sibi proximam attrahit, alteram hæc, & sic de cæteris. Primam ergo citius ductam celerius sequentur cæteræ omnes. Molecula ergo tum in primis venarum radiculis impacta, impetu majori si fertur, eodem tenore provolvitur è capillaribus arteriosis alia nundum egressa. Hic victi aliorum movent castra, & hydraulicas leges offendere hanc nostram opinionem clamitant. Non certiore feriunt jaculo, aliæ utpote leges fluidi in canalem ferreum ex omni parte æqualem incurrentis, aliæ sanguinis per arterias ducti. Quantum per os ferrei superius injicitur liquidi, tantum ex inferiore extremo effluit, eò forsitan, quòd aquæ putà guttulæ, ceu globuli eburnei, in eadem serie disponantur, & sic motus ultimæ impressus, primæ alteri communicetur. Talis globulorum sanguinis dispositio minimè concipi potest. Huic officit motus liquorum intestinus, qui sic se habet. Cruor è corde projectus, ultimis impeditus arteriarum sinibus, dilatat eas, brevi post nisu elastico in pristinum statum restituendas; quocirca globuli, alternis vicibus, à peripheria ad centrum, ad peripheriam à centro protruduntur. Ex aortæ mox à principio, aliorumque ramorum curvatura, alia omni momento sanguineis moleculis conciliatur positura. Ad hæc paucula aeris particularum sanguini interjectarum copia, resilit compressa, globulos diducit, & in diversas partes pellit. Multiplici hæc de causâ, moleculæ quaquæ-

versum actæ, ex opposita parte sibi occurrentes, leviter juxta latera se se collidentes, fusdeque volutantur, & mutuo sunt sibi impedimento. Lentescit ideo motus projectilis. Tantus præterea in vasculis minimis affrictus, tanta à vi motrice distantia, tanta denique globulorum cohors, ut omninò mox pereat motus collisionis. Minus liberè moveri moleculas sanguinis, utpotè sulphuras & facilè concrescibiles, quàm serosi humoris guttulas profiteri temerarium esse nos non duximus. Facili negotio igne concrescit lymphæ, & globulosa pars in durum ac scissile coagulum, in hemina aëri libero exposita cogitur. Opinio nostra acerrimo, quo nonnunquam algent manus & pedes, frigore probatur. Ex celeriori massæ humorum circuitu nasci calorem, majoremque per totum corpus diffundi, pro partis globulosæ abundantia, certo certius. Si frigent ergo extrema, lentior circulatio accusanda, minorque affrictus; nam adæquata partibus sit ubique globulorum distributio. Circulationis autem tarditatem infert major à corde distantia, motus sanguinis intestinalis, valde imminuta vis à corde impressa, quam fovere deberet summa partium, quibus innixæ reptant arteriæ, durities, ac elasticitas. Hinc ergo colligere est diversas utriusque liquoris per vasa sibi propria circumducti leges. Legibus hydraulicis ergo non repugnat nostra sententia; hinc ergo conjicere est, ad motum sanguinis in minimis vasculis plus conducere attractionem, quàm pulsus à tergo.

*Ergo ad motum Sanguinis in minimis vasculis plus facit attractio, quàm pulsus à tergo.*

#### DOMINI DOCTORES DISPUTATURI.

<i>M. Claudius - Thomas - Guillelmus Guilbert de Préval.</i>	<i>M. Joannes-Baptista Bas- seville.</i>	<i>M. Joannes-Baptista du Bois, Professor Regius Emeritus.</i>
<i>M. Jacobus Gourlez de la Motte.</i>	<i>M. Simon-Antonius Brin- gaud.</i>	<i>M. Guillelmus - Josephus de l'Epine, antiquus Fa- cultatis Decanus.</i>
<i>M. Paulus le Roy.</i>	<i>M. Jacobus - Franciscus Latier.</i>	<i>M. Ludovicus - Hierony- mus Cosnier.</i>

Proponebat Parisiis MARINUS-JACOBUS-CLARUS ROBERT;  
Cadomenfis, Universitatis Cadomenfis Doctor, Saluberrimæ Facultatis  
Medicinæ Parisiensis Baccalaureus, Theſeos Author, A. R. S. H. 1756;  
A SEXTA AD MERIDIEM.